

【幸福个味緒】李淑娟原作

幸福係麼个味緒？有人會講，係放學時節轉到屋下，對灶下飄散出來个燜豬腳香味；有人會講，係阿爸下班過後圓身項臭汗臊个味緒；也有人講，係暗晡頭屋背該頭桂花樹淡淡个花香。味緒，看毋著、聽毋著也摸毋著，盡趣妙个係，佢總係做得同傀兜個回憶圓共下，食著、鼻著共樣味緒个時節，回憶也會踰等像戲齣樣仔又再放送出來。

吾爸在𠵼讀國中三年生个時節過身咧，因為發現肝癌个時節忒慢，既經第三期。佢辭忒頭路拖等著病个身體做咧年過个治療，攞吾姆同𠵼兩兄弟就轉長山賣鴨卵吶。阿爸分𠵼印象最深个毋係長壽菸个味緒，毋係醫院吊大筈射个藥味，顛倒係厥手路菜「番茄<sup>1</sup>炒卵」个好味緒。

阿爸个「番茄炒卵」定著愛特別用臨暗頭市場項伸个、有靠傷个、媸媸个番茄，因為該下仔頭家愛收攤吶，會半買半相送。佢當沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，紅啾油光油光个番茄，

合等該綿綿嫩嫩又黃蠟个雞卵，還言入嘴就先吞口涎水哩。該香香又酸酸甜甜个味緒，單淨攬味就做得划忒兩碗白飯，這幸福个味緒一直圓在𠵼記憶裡背毋會散忒。

阿爸做化療該段時間，阿姆天吉光愛先去送牛乳，再趕去工地做小工，無時間煮飯。𠵼同老弟輒常食白飯傍醬菜、豆腐乳、魚仔罐頭，係無就泡麵加一粒雞卵。阿爸愁慮𠵼兜營養毋罅，刻耐仔忍等身體个毋鬆爽煮菜分𠵼兜食。每擺酸酸甜甜个味緒食落肚，𠵼个心乜跔等酸酸甜甜，甜个係阿爸惜子个心意，酸个係，毋知還做得再食著幾多擺這幸福个味緒？

對𠵼來講，幸福就係「番茄炒卵」該酸酸甜甜个味緒，佢總會帶出𠵼最深、最甜个回憶，分𠵼看著阿爸黃蠟个面容項掛等滿足个笑容。這下𠵼又乜最驚食著這項菜，因為𠵼驚食忒多別家个「番茄炒卵」，會害𠵼添放忒記憶當中阿爸留分𠵼个味緒，該阿爸惜子个味緒，𠵼同阿爸共下个幸福味緒。

<sup>1</sup> 番茄：音 to<sup>v</sup> ma do<sup>v</sup>；番茄（英文 tomato），屬茄科，又名柑仔蜜、西紅柿等。

編號 4 號

【蔥仔】謝宜庭原作

「阿姆，𠂌就無愛食蔥仔，仰愛監人食啊？」阿綸牯緊挑忒<sup>1</sup>碗肚个蔥仔緊喊到大姍聲。𠂌摟佢講：「細人仔莫恁揀食啦！」阿綸牯嘴扁扁、會噉會噉个樣仔，實在有罅刺眼。食蔥仔敢有恁艱苦？

其實蔥仔當好食啊，像炒炒肉、煮惜圓係無放兜蔥仔就試著無香無氣！蔥仔𠂌從細食到大，因爭阿爸就係種蔥仔个啊。還記得細細時節，阿爸在田脣摘好蔥仔，𠂌摟阿哥愛去脣項个水窟仔捲手洗蔥仔，洗到歸身仔緊顫，一雙手紅冬冬。正月恁寒个天時，係做得捲被骨在眠床項搵等，毋知有幾好。

洗好个蔥仔分做兩斤一抓<sup>2</sup>、禾稈浸過水扭扭啊繩蔥仔，天吉光阿爸就用野狼機車載去大市賣。有一年蔥仔當好價，阿爸賣蔥仔賣到有錢好起屋哩。該時，在莊下十過萬銀就起得兩棧个樓屋吔，歸屋下人儕儕暢到耐毋得，發夢都會笑哦。毋過該下屋仔還吉起，阿爸嘎發生一件大事。

<sup>1</sup> 挑忒：音 tiau` ted`；經過挑選後，除去不合適的。

<sup>2</sup> 一抓：音 id` za`；一把。

該日，阿爸去摟鄰舍捲犁田，毋知仰仔好恬恬嘎分打田機捲落去。佢忍等痛遽遽蹶起來，毋過腳盤同腳趾公還係分耕耘刀仔削到血漬漬仔。大家嚇到發痴驚，煞煞摟佢送去醫院急診。先生講阿爸愛戴院，毋過該下日仔過到苦煎煎仔，仰有錢請人顧佢呢？阿姆高不將喊正七歲還言讀書个𠂌去顧阿爸，護士都阿腦𠂌仰會恁曉得。其實𠂌毋係曉得，𠂌係毋盼得阿爸無人顧定定。

逐日臨暗仔，阿姆會渡阿哥、老妹來醫院摟𠂌做伴共下歇。食飽夜，𠂌兜細人仔就會去醫院个晒棚項搞园人尋。做鬼个人偷偷摟摟去尋人，園个人乜搞到心肝嘩嘩滾，實在還好搞哦。

天甫光仔，阿姆佢兜轉屋下，又伸𠂌一儕顧阿爸吔。𠂌頭磬磬仔看在眠床項睡等个阿爸，細細聲講：「阿爸，你愛遽遽好起來哦。等你出院，俾俚就做得起屋仔哩。」該時𠂌還毋知，阿爸賣蔥仔賺來愛起屋个錢，早就分戴院个醫藥費食忒，無伸半銚錢<sup>3</sup>吔。

逐擺看著青里里个蔥仔，𠂌還會想起該冷沁沁个寒天、凍到硬鉸硬鉸个雙手、起新屋這深深个盼望、阿爸著傷个悲傷，還有在醫院搞园人尋個暢樂。一抓蔥仔，毋單淨有餳人个香氣，還有𠂌滌滌個回憶，張等人生个酸甜苦辣、百樣滋味。

<sup>3</sup> 半銚錢：音 ban xien` qien`；半分錢。

編號 7 號

【風搓日】張慈媛原作

還細時節，見擺堵著風搓日，就係吾爸愛出門整電火楯个日仔，也係歸宿舍婦人家同細人仔共下攤手接電話个日仔。

吾爸在臺電食頭路，整電火楯時，愛同腳踏釘插入去每一個空裡肚，正做得手爬腳蹶上去頂項做事。堵著風搓日又係風又係雨，一下仔就無電咧。臺電個工作人員接著電話，就愛緊工著水衣去修理。在電火楯頂高湊雨搶時間，該斯正經愛請佛祖保庇，正有好安全下來。

老古人講：「七月落水又起風，十個柑園九個空。」一個風搓入來臺灣，電線分佢吹壞忒，臺電服務所個電話就毋識停過。工作人員做儘<sup>1</sup>出去修理搶通電，辦公室既經無人吔，電話還係響毋會煞，麼人去接？就係佢兜歇在宿舍个家眷。男仔人出去修理，婦人家帶等細人仔全部在辦公室輪等接電話。打電話入來个人大體係打來罵人个，問講：「做麼个吾這片个電吉來？吾魚塘裡肚个魚仔愛死忒咧！」佢心肝肚惱想，恁暗个夜，吾爸在風雨裡肚个電火楯頂項，佢也當想吾爸平平安安遽遽轉來。新聞主播

在電視裡肚提醒大家，係無要緊个事情莫出門；吾爸嘎顛倒愛遽遽出門。

俗話講：「風來從風，雨來從雨。」年視年來拜訪个風搓，教佢兜仰般接待這個逐年來个人客。該央時，氣象報告係通知有風搓愛來吔，大家定著愛用特補<sup>2</sup>貼窗仔，煞猛準備蠟燭、泡麵，還有餅仔這兜較燥又耐放个東西，續下來還愛承水。因爭風搓來吔就表示會漚雨、浸水、停電，成時還會停水。幾下日無法度出門，故所，一屋下人生活需要个東西愛準備好勢。

社會緊來緊進步，風搓入來進前，政府會提醒大家，莫行兼海脣，歇在山區个人愛注意屙泥落石<sup>3</sup>，社會大眾个安全漸漸仔分人重視。祝福每一儕人像吾爸共樣，每擺就平安轉屋下。

<sup>1</sup> 做儘：音 zo qin；全部。聽任、隨意、不加限制。

<sup>2</sup> 特補：音 ted bu`；膠帶。

<sup>3</sup> 屜泥落石：音 o` nai` log sag；土石流。